

開放文學 – 歷代筆記 – 夷堅甲志 卷第十五

薛檢法妻 薛度·紹興初為夔路提刑司檢法官·官舍在恭州·其妻病·召醫者劉太初療之·不效以死·移時復開目·問醫姓名鄉里甚詳·已而竟死·後數年·劉徙居荊南·白晝有緋衣婦人·蒙首入門·雲有疾求治·劉不在家·家人以實告·婦人徑入·及中堂·端坐以待·或發其首幕·乃一觸體·驚呼問·遂不見·劉自是醫道浸衰·家日貧悴·時薛君為潭之衡山宰·聞其事·泣曰·吾妻也·

雷震二蠻

邕州守臣兼經略都監·每歲至橫山寨·與交人互市·紹興二十三年·趙願為守·至寨市馬·蠻千餘人·往來憧憧·為過二民行省地中·為所殺·掠同行一婦人以去·願不能捕詰·明日·天無雲·雷震一聲·隕二蠻於地·屍一仰一俯·正如二民死時狀·蠻酋恐懼·訪知其事·即送婦人還邕·劉襄子思說·

馬仙姑

果州馬仙姑者·以女子得道·嘗為一亡賴道人·醉以藥酒而淫之·後忽忽如狂·靖康元年閏十一月二十五日·衣衰麻杖經哭於市·曰·今日天帝死·吾為行服·市人皆唾罵逐之·後聞京師以是日失守·楊樸公全說·時為工曹掾·

陳尊者

閩州僧陳尊者·居常落拓如狂·而言事多先見·人莫能測·紹興元年四月十四日·忽衣衰麻·望譙門大哭·或曰·此州治也·何得爾·曰·今日佛下世故哭·聞者皆以為誕·逾月而奉隆祐遺誥·其哭之日·乃上仙日也·外舅說·

賈思誠馬夢

賈思誠·字彥孚·紹興十七年·為夔州帥·夢受命責官·卒挾馬來迎·臨欲攬轡·細視馬有十三足·歎異而覺·明日背疽發·十三日死·賈生於庚午·近馬禍雲·張達說·

淨居岩蛟

衡山縣西北淨居岩·有蛟窟於中·僧宗譽初至·樂其幽閒·謀結庵·為婦人數出擾·不敢留·避諸嶽寺·紹興十一年·僧善同來居之·才草屋數間·游僧妙印·在他舍·婦人來與合·自腰以下·即冷如冰·數日死·行者祖淵·採木於山·後迷不還·凡五日·求得於老虎岩中·雲一婦人令住此·今出求果餌以飼我·岩口甚窄·僅容人身·而其中頗廣·蓋蛟所穴也·祖淵歸亦病·是年四月幾望·風雨暴至·遍山皆黑·電雷掣旋屋外·善同素不睡·宴坐龕中·夜且半·起明燈·聞聲出龕下·如鼓鞀然·視之·乃巨蟒蟠結數匝·尾猶在戶外·善同呼眾僧·以杖擊去·既去復回·又擊之·始趨入石罅·未及而震死·山水大至·衝室屋大半·已而月星粲然·明且·視死蟒長二丈許·圍數尺·體皆黑方花紋·祖淵即日發狂·嗟惜數月亦死·前後僧僕為所殺者凡八人·向時每夜·山輒昏昧·雖月出亦然·自蟒死·夜色始明·今有屋數十間·僧十輩雲·善同說·

伊陽古瓶

張虞卿者·文定公齊賢裔孫·居西京伊陽縣小水鎮·得古瓦瓶於土中·色甚黑·頗愛之·置書室養花·方冬極寒·一夕忘去水·意□□□□之·凡他物有水者皆凍·獨此瓶不然·異之·□以湯·終日不冷·張或與客出郊·置瓶於篋·傾水淪茗·皆如新沸者·自是始知秘惜·後為醉僕觸碎·視其中與常陶器等·但夾底厚幾二寸·有鬼執火以燎·刻畫甚精·無人能識其為何時物也·

晁安宅妻

鄧州晁氏·大族也·相傳云自漢以來居南陽·劉先主嘗從貸錢數萬·諸葛孔明作保·立券猶存其家·建炎二年·鄧民殘於胡兵·或俘或死·晁氏男女數百人·皆囚以北·至汾州青灰山·為紅巾邵伯邀擊·盡失所掠而去·晁安宅之妻某氏·並其女及乳母·皆為邵之黨王生所得·張丞相宣撫陝蜀·邵舉軍來降·王生為右軍小將·與晁婦同處於閩中·閩有靈顯王廟·婦與乳媪以月二日往焚香·媪視道上一丐者·病以敝紙自蔽·形容甚悴·諦觀之·以告婦·曰·有丐者絕類吾十一郎·遣詢其鄉里姓行·果安宅也·婦色不動·令媪持金釵與之·約十六日復會·且戒無易服·及期相見·又與金二兩·曰·以其半詣宣撫司投牒·其半買舟置某所以待我·安宅既通訴宣撫·下軍吏逮王生·會王出獵·婦攜己所有直數千婚·與媪及女赴安宅舟·順流而下·王生家貲巨萬·一錢不取也·王晚歸·不見其妻·而追牒又至·視室中之藏皆在·喟然曰·素聞渠為晁家婦·今往從其夫·理之常也·了不以介意·晁氏夫婦離而復合如初·婦人不忘故夫·於丐中·求之·古烈女可也·惜逸其姓氏·王雖武夫·蓋亦知義理可喜者·

犬醫張三首

唐州方城縣典史張三之妻·本倡也·兇暴殘虐·婢使小過·輒以錢絀其發·使相觸有聲·稍怠則杖之·或以針鐵爪使爬土·或置諸布囊·以錐刺之·凡殺數妾·夫畏之不敢言·後殺其子婦·婦家詣縣訴·縣檄尉檢屍·小婢出呼曰·床下又有死者·可並驗也·獄具·以倡非正堂·與平人相殺等·屍於唐州市·張自是亦病·左支皆廢·涕淚出不禁·以首就桎·始得食·三年而死·既葬·為野犬齧墓·揭棺銜首·擲之縣門外而去·三事皆妻叔張宗一貫道說·

蛇王三

方城民王三·善捕蛇·每至人門·則能知其家地多少·見在某處·有為害者取食之·人目為蛇王三·方城令得一蛇·召之使食·為爪所傷·抉二齒·近村民苦毒蟒出沒為害·釀金十萬·命王作法以捕·王畫地為三溝·語人曰·若是常蛇·越一溝即死·極不過二·如能歷三溝·則我反為所噬矣·既而蛇徑前無所畏·欲就王·王甚窘·亟脫袴中裂之·蛇分為兩死焉·嘗適麥陂村·謂富室曰·君家有巨黑蛇·方旺財不宜取·富室欲驗其言·強使取之·王書片紙·命其人投於廚後牆左角水穴·呼曰·蛇王三喚汝·即急走·勿反顧·恐傷汝·其人不信·投紙畢·少留觀之·則巨黑蛇已出·其人驚僕·蛇從旁徑出至王所·王袖之而行·其家自是果破·予婦家居麥陂·數呼之至·建炎盜起·不知所終·或以為蛇精雲·

應聲蟲

永州通判廳軍員毛景·得奇疾·每語喉中輒有物作聲相應·有道人教令學誦本草藥名·至藍而默然·遂取藍振汁飲之·少頃·嘔出肉塊長二寸餘·人形悉具·劉襄子思為永倅·景正被疾逾年·親見其愈·予記前書載應聲蟲·因服雷丸而止·與此相類·

辛中丞

辛企李次膺紹興八年·自右正言出為湖南提刑·舟到武昌·大將岳飛來江亭通謁·辛以道上不見賓客為解·岳不肯去·良久不獲已見之·即欲以明日具食·意殊懇切·不得辭·既宴·酒三行·延辛入小合·盡出平生所被宸翰·凡數百紙·具言眷遇之渥·執辛手曰·前夕夢為棘寺逮對獄·獄吏曰·辛中丞被旨推勘·驚寤·遍體流汗·方疑懼·不敢以告人·而津吏報公至·公自諫官補外·他日必為獨坐·飛或不幸下獄·願公救護之·辛悚然不知所對·才罷酒·即解維·後數年·飛罷副樞奉朝請·故部將王貴迎時相意·告其謀叛·係大理獄·命新除御史中丞何伯壽鑄治其事·方悟昨夢乃新中丞也·何公後辭避不就·乃以付萬俟卨相雲·二事劉襄子思說·

豬精

紹興十年春·樂平人馬元益·赴大理寺監門·與婢意奴俱行·至上饒道中·同謁一神祠丐福·是歲六月·婢夢與馬至所謁祠下·有親事官數輩傳呼曰·大卿請·指前高樓雲·大卿在彼幸豬·為慶會召寮屬·明日·馬以語寺卿週三畏·意建亥之月·當有遷陟·明年冬·寺中作制院鞠岳飛·遇夜周卿往往間行至鞠所·一夕月微明·見古木下一物·似豕而角·周疑駭卻步·此物徐行·往

獄旁小祠而隱·經數夕復往·月甚明·又見前怪·首上有片紙書發字·周調獄成當有恩渥·既而聞岳之門僧惠清·言岳微時居相台·為市游徼·有舒翁者·善相人·見岳必烹茶設饌·嘗密謂之曰·君乃豬精也·精靈在人間·必有異事·它日當為朝廷握十萬之師·建功立業·位至三公·然豬之為物·未有善終·必為人屠宰·君如得志·宜早退步也·岳笑不以為然·至是方驗·元益說·沃焦山寺

紹聖中·有僧游天台·迷失道·入越州新昌縣沃焦山上·遇大佛剎·寂無人聲·頗歎叢林之整肅如此·既登堂·望官吏治事甚嚴·疑深山中不應爾·徐入法堂·過屋兩重·始見長老數人·相對默坐·僧前欲問訊·搖手止之·不敢問·卻下僧堂·側立以視·有頃·聞請第一員長老升堂·其人號泣就坐·紫衣金章者立於前·瞬息間·火從坐者體中起·延燒其身·並及金紫者·不留遺燼·次第升堂·週而復始·僧問吏何為·吏言平生無戒業·妄作住持人·謗佛正法·故受此報·金紫者請主也·僧懼亟出·至山腰·逢數卒驅一老婦人·彷彿認其母·回首留顧·老婦呼曰·以汝平日妄談般若·累我至是·其行甚遽·不得複語·僧下山覓路·問居人此山何寺·曰·路絕人行·安得有寺·指別路示之·雲此去天台道也·問其日·則已三宿矣·不復東遊·徑還家·母已死·時播傳此事·長老退居者數人·關子東·強幼安·皆作文以記·

羅浮仙人

藍喬·字子升·循州龍川人·母陳氏無子·禱羅浮山而孕·及期·夢仙鶴集其居·是夕生喬·室有異光·年十二·已能為詩文·有相者謂陳曰·爾子有奇骨·仕官當至將相·學道必為神仙·喬曰·將相不足為·乃所願則輕舉耳·自是求道書讀之·患獨學無師友·因辭母之江淮·抵京師·七年而歸·語母曰·兒本漂然江湖·所以復反者·念母故也·瓢中出丹一粒饋焉·曰·服之可長年無疾·留歲餘·復有所往·以黃金數斤遺母·曰·是真氣噓冶所成·母寶用之·兒不歸矣·潮人吳子野·遇之於京師·方大暑·同登汴橋買瓜·喬曰·塵埃污吾瓜·當於水中啖耳·自擲於河·吳注目以視·時時有瓜皮浮出水面·齷亦儼然·至夜不出·吳往候其邸·則已酣寢·鼻間氣如雷·徐開目雲·波中待子食瓜·久之不至·何也·吳始知喬已得道·再拜愧謝·遂與執轡·後游洛陽·布衣百結·每入酒肆·輒飲數鬥·常置紙百番於足下·令人片片拽之·無一破者·蓋身輕乃爾·語人曰·吾羅浮仙人也·由此昇天矣·一日·貨藥郊外·復置紙足底·令觀者取之·紙盡足浮·風雲翳翳·躡而上微·仙鶴成群·自南來迎·望之隱然·歷歷聞空中笙簫音·猶長吟李太白詩云·下窺夫子不可及·矯首相思空斷腸·母壽九十七而終·葬之日·樵牧者聞墟墓間哭聲·識者知其來歸雲·英州人鄭總作傳·

毛氏父祖

衢州江山縣士人毛璇·當舍法時在學校·以不能治生·家事堙替·議鬻居屋·未及售·晨起見亡祖父母四人·列坐廳上·衣冠容貌·不殊生人·璇驚拜問曰·去世已久·安得至此·皆不答·惟父曰·見汝無好情況·因仰視屋太息曰·汝前程尚遠·可寬心·璇問地獄如何·父曰·有罪始入耳·吾無罪當受生·但資次未到·曰·既未有所歸·還只在墳墓否·曰·不然·日間東來西去閒遊·惟夜間不可說·近日汝預葉氏墦間祭·我亦在彼·指門外五通神·曰·神力甚大·閒野之鬼不可入·又指所事真武·曰·謹事之·死後不入獄·便詣北斗下為弟子·璇曰·大人且在是·當呼大兄來·父止之·曰·我腳頭緊·便去矣·令璇入門·數人皆下庭中·向空飛去·如鳥鵲然·直上不見·璇方悵望·而一僕自外至·蓋不欲與生人接·所以亟去也·

方典薄命